



سيارن اخبار
PRESS RELEASE

KEMENTERIAN KESIHATAN • Jalan Menteri Besar, Bandar Seri Begawan BB3910, Negara Brunei Darussalam.
Tel: 2381640 samb./ext. 7734 • Faks/Fax: 2383016 • E-mel/E-mail: prohealth@brunet.bn

SIARAN AKHBAR 

KENYATAAN MEDIA

SITUASI TERKINI JANGKITAN COVID-19

DI NEGARA BRUNEI DARUSSALAM

09 Jamadilawal 1442 / 24 Disember 2020

1. Kementerian Kesihatan ingin memaklumkan kepada orang ramai bahawa pada hari ini, Khamis, 09 Jamadilawal 1442H bersamaan 24 Disember 2020M, Alhamdulillah dengan izin Allah Subhanahu Wa Ta'Ala jua, **tidak ada kes baru** jangkitan COVID-19 telah disahkan di negara ini. Ini bermakna **jumlah keseluruhan kes COVID-19 di negara ini kekal seramai 152 orang.**
2. Sementara itu, **tidak ada kes aktif** sedang dirawat Pusat Pengasingan Kebangsaan dan **jumlah kes yang telah sembuh kekal seramai 149 orang.**
3. Setakat ini, sebanyak **11 kes import** telah disahkan sejak kes jangkitan tempatan terakhir dilaporkan pada 6 Mei 2020 yang mana dengan

ini, Negara Brunei Darussalam telah mencatatkan **232 hari tanpa kes jangkitan tempatan COVID-19.**

4. Pada hari ini, seramai **752 orang sedang menjalani pengasingan diri mandatori** di pusat-pusat pemantauan yang disediakan oleh Kerajaan iaitu mereka yang baru tiba ke negara ini setelah melakukan perjalanan dari luar negara. Setakat ini, seramai **9,943 orang telah menamatkan pengasingan diri mandatori** di kemudahan-kemudahan berkenaan.

5. Dalam tempoh 24 jam yang lalu, **sebanyak 131 sampel telah diuji** bagi virus SARS-CoV-2 yang membawa jumlah keseluruhan ujian makmal dijalankan sejak Januari 2020 kepada **82,039 ujian.**

6. Kementerian Kesihatan ingin mengingatkan orang ramai untuk mengamalkan tanggungjawab sosial masing-masing dengan mengamalkan kebersihan diri, etika bersin yang betul, digalakkan memakai sungkup muka (*face mask*) apabila berada di tempat-tempat awam yang penuh sesak dan jika merasa kurang sihat, tidak menghadirkan diri ke tempat-tempat awam dan majlis-majlis

keramaian. Sebagaimana peruntukan di bawah Akta Penyakit Berjangkit (Penggai 204), orang ramai adalah dikehendaki untuk mematuhi segala peraturan dan arahan yang telah dikeluarkan dan masih berkuatkuasa semasa pandemik COVID-19 ini

7. Disamping itu, Kementerian Kesihatan juga ingin memaklumkan kepada orang ramai berkenaan dengan **situasi jangkitan COVID-19 di United Kingdom.**

8. Pada 19 Disember 2020, kerajaan United Kingdom telah melaporkan mengenai **penemuan varian baru** bagi virus SARS-CoV-2 yang telah didapati merebak di beberapa kawasan di negara tersebut. Varian virus baru ini yang diberikan nama **B.1.1.7 (VUI-202012/01)** adalah merupakan mutasi pada kod genetik virus SARS-CoV-2 yang telah bermula sejak bulan September 2020.

9. SARS-CoV-2 adalah sejenis virus RNA dan mutasi virus berlaku secara semula jadi dalam proses replikasi virus. Ribuan mutasi atau perubahan boleh dan telah berlaku pada virus SARS-CoV-2 tersebut tetapi hanya sebilangan kecil yang menyebabkan perubahan yang

penting kepada sifat virus tersebut. Pihak berkuasa kesihatan di United Kingdom telah menyatakan bahawa varian yang baru dilaporkan ini meningkatkan kemampuan virus tersebut untuk **lebih mudah berjangkit atau *transmissable*** dari seorang individu ke individu lain.

10. Walaupun varian atau *strain* baru ini dikatakan lebih mudah berjangkit, namun tidak ada bukti yang menunjukkan strain ini menyebabkan perubahan kepada ***severity* penyakit ataupun kepada tindak balas antibodi mahupun kepada keberkesanan vaksin terhadap virus tersebut.** Aspek-aspek ini masih giat disiasat oleh pihak berkuasa di United Kingdom.

11. Kementerian Kesihatan akan secara berterusan memantau dan menilai situasi ini dan melaksanakan penilaian terhadap maklumat terkini mengenai varian virus baru ini. Setakat ini, **tiada jangkitan yang disebabkan oleh varian baru ini dilaporkan di Negara Brunei Darussalam** dan hasil dapatan analisis saintifik Kementerian Kesihatan menunjukkan bahawa ujian PCR yang sedia ada di Negara Brunei Darussalam akan **mampu mengesan jangkitan** yang

disebabkan oleh varian baru ini. Walau bagaimanapun, Kementerian Kesihatan telah mengambil tindakan untuk meningkatkan langkah-langkah pencegahan dan pengawalan bagi mencegah pengimportan varian virus baru ini.

12. Di Negara Brunei Darussalam, kawalan perjalanan keluar dan masuk ke dalam negeri **masih lagi dikuatkuasakan** sebagai langkah-langkah pencegahan COVID-19. Semua perjalanan yang tidak penting (*non-essential travel*) ke Negara Brunei Darussalam telah dihentikan buat sementara waktu. Permohonan yang telah dibuat bagi perjalanan penting (*essential travel*) dan telah diberikan kebenaran oleh Jabatan Imigresen dan Pendaftaran Kebangsaan adalah dikehendaki untuk menunjukkan **bukti ujian RT-PCR COVID-19 negatif** tidak lebih dari 72 jam sebelum berlepas ke Negara Brunei Darussalam dan dikehendaki untuk menjalani pengasingan diri mandatori (*mandatory self-isolation*) bagi tempoh sehingga 14 hari dari tarikh ketibaan serta hanya akan dibenarkan keluar dari pengasingan diri apabila mendapatkan keputusan ujian COVID-19 negatif.

13. Laporan situasi terkini berkenaan varian COVID-19 yang baru ini menekankan kepentingan untuk mengenalpasti vaksin yang selamat dan berkesan terhadap COVID-19 untuk memastikan Negara Brunei Darussalam sentiasa dilindungi daripada kemunculan ancaman baru (*emerging threats*). Dalam hal ini, Kementerian Kesihatan telah meneliti data dan maklumat terhadap calon-calon vaksin yang ada pada masa kini. Pihak Kerajaan sedang giat mengenal pasti calon-calon vaksin yang efektif dan selamat serta berusaha untuk mendapatkan akses kepada vaksin-vaksin tersebut. Perbincangan pelbagai hala (*multilateral discussions*) melalui kemudahan COVAX dan dua hala (*bilateral arrangements*) dengan pengeluar vaksin yang tertentu telah diadakan serta perundingan tambahan lain juga diadakan untuk menjamin akses dan perolehan vaksin bagi Negara Brunei Darussalam.

14. Calon-calon vaksin yang ada setakat ini menggunakan teknologi berlainan termasuk *inactivated virus, protein subunit, viral vector* dan *mRNA*. Kesemua teknologi vaksin ini mempunyai profil keselamatan dan keberkesanan yang berbeza yang mana ianya hanya akan dapat ditentukan selepas hasil keputusan daripada *Phase 3 Clinical Trial*

vaksin-vaksin tersebut dapat diteliti nanti. Mana-mana vaksin yang akan digunakan nanti adalah perlu untuk menjalani proses penelitian regulatori yang dikuatkuasakan oleh *Brunei Darussalam Medicines Control Authority (BDMCA)*.

15. Disamping usaha dalam menjamin perolehan vaksin, Kementerian Kesihatan juga sedang mempersiapkan strategi *deployment* kebangsaan untuk dilaksanakan apabila vaksin COVID-19 yang selamat dan berkesan sudah tersedia untuk digunakan. Sebuah jawatankuasa teknikal telah dibentuk untuk merangka dan melaksanakan **Strategi Vaksinasi Negara (*National Vaccination Strategy*)**. Oleh kerana bekalan global vaksin yang terhad, pengagihan vaksin akan dilakukan secara berfasa dan keutamaan diberikan kepada **individu-individu yang berisiko tinggi terlebih dahulu**. Apabila program vaksin ini telah dilaksanakan, setiap individu boleh memainkan peranan mereka dengan mendapatkan vaksin apabila mereka ditawarkan vaksin tersebut. Ini akan memastikan bahawa setiap individu dapat melindungi diri sendiri, orang yang mereka sayangi dan juga masyarakat daripada jangkitan COVID-19.

16. Kementerian Kesihatan akan terus memantau situasi wabak di dalam negara serta di peringkat serantau dan global dan akan melaksanakan penilaian risiko secara berterusan. Kementerian Kesihatan akan memaklumkan kepada orang ramai mengenai sebarang perubahan mengenai situasi ini, jika perlu dari masa ke masa.

17. Untuk maklumat lanjut dan perkembangan terkini, orang ramai boleh melayari laman web Kementerian Kesihatan iaitu www.moh.gov.bn atau menghubungi **Talian Nasihat Kesihatan 148** atau melalui **aplikasi BruHealth**.

- TAMAT -

Rujukan : KK/PR/2

Tarikh : 09 Jamadilawal 1442H / 24 Disember 2020